

南北史合注

欽定四庫全書

南北史合注卷九十六

明 李清撰

周本紀下第十

北史十

高祖武皇帝諱邕字禰羅突文帝第四子母叱奴太后
魏大統九年生於同州有神光照室幼而孝敬聰敏有
器質文帝異之曰成吾志者此兒年十二封輔城郡公
孝閔帝踐阼拜大將軍出鎮同州明帝即位遷柱國授

蒲州刺史入為大司空行御正進封魯國公領宗師甚見親愛叅議朝廷大事性沉深有遠識非因顧問終無所言明帝每嘆曰夫人不言言必有中武成二年四月帝崩遺詔傳位於公公固讓百官勸進乃從之壬寅即皇帝位大赦冬十二月改作路門是歲齊孝昭帝廢其主殷而自立

是歲陳文帝天嘉元年又齊主殷乾明元年孝昭帝
皇建元年

保定元年春正月戊申改元文武百官各增四級以大
冢宰晉公護為都督中外諸軍事令五府總於天官庚
戌祀圓丘壬子祀方丘甲寅祀感帝於南郊乙卯祭太
社己巳享太廟班文帝所述六官於廟庭

冊府元龜載詔曰太祖文皇帝捨末魏倣風誕述六
官厥用允集所謂乾坤改而重構詎止帝王洪範已
哉今可班於太祖廟庭以揚休烈

甲戌板授高年官各有差乙亥親耕籍田丙子大射於

正武殿賜百官各有差二月己卯遣大使巡察天下風俗甲午朝日於東郊丙午省輦輿去百戲弘農上言九尾狐見三月丙寅改八丁兵為十二丁兵率歲一月役夏四月丙子朔日有蝕之庚寅以少傅吳公尉遲綱為大司空丁酉白蘭遣使獻犀甲鐵鎧五月丙午封孝閔帝子康為紀國公皇子贊為魯國公晉公護獲玉斗以獻六月乙酉遣御正殷不害使於陳秋七月戊申以旱故詔所在降死罪已下囚更鑄錢文曰布泉以一當五

與五銖並行

周書載己酉追封皇伯父顓為郡國公次伯父連為杞國公第三伯父洛生為莒國公又追封武邑公震為宋國公並襲封

九月甲辰南寧州使獻滇馬及蜀鎧冬十月甲戌朔日有蝕之十一月乙巳陳人來聘進封柱國廣武公竇熾為鄧國公丁巳狩於岐陽是月齊孝昭帝殂十二月車駕至自岐陽是歲突厥吐谷渾高昌宕昌龜茲等國並

遣使朝貢

是歲齊武成帝大寧元年

二年春正月壬寅初於蒲州開河渠同州開龍首渠以
廣灌溉丁未以陳主弟項為柱國送還江南閏月己亥
大司馬涼公賀蘭祥卒二月癸丑以久不雨宥罪人京
城三十里內禁酒梁宣帝殂夏四月甲辰以旱故禁屠
宰

周書載丁巳南陽獻三足烏湘州上言見二白鹿從

三角獸而行

癸亥詔曰諸柱國等勲德隆重宜有優崇各準別制邑戶聽寄食他縣五月庚午以山南衆瑞並集大赦免今年役及租賦之半壬辰以柱國隋公楊忠為大司空六月己亥以柱國蜀公尉遲廻為大司馬分山南荊州安州襄州江陵為四總管秋七月己巳封開府賀拔緯為霍國公九月戊辰朔日有蝕之陳人來聘冬十月辛亥帝御大武殿大射戊午講武於少陵原

冊府元龜載丁未詔曰昔唐堯疎葛之衣粗糲之食
尚臨汾陽而永嘆登姑射而興想況無聖人之德而
嗜欲過之朕甚惡焉今巨寇未平軍費甚廣百姓誰
與為足凡朕衣服飲食所須爰及宮內調度朕今手
自減削凡爾百司其各思省約曷朕不逮

十一月丁卯以大將軍衛公直趙公招並為柱國

是歲齊河清元年後梁孝明帝天保元年

三年春正月辛未改光遷國為遷州乙酉冢宰護逼殺

太保梁公侯莫陳崇二月庚子初頒新律辛丑渭州獻
一足烏辛酉詔自今舉大事行大政非軍機急速皆依
月令以順天心三月乙丑朔日有蝕之丙子宕昌國獻
生猛虎二詔放之南山乙酉益州獻三足烏夏四月乙
未以柱國鄭公達奚武為太保大將軍韓果為柱國己
亥帝御正武殿錄囚徒癸卯大雩癸丑有牛足生於背
戊午幸太學以太傅燕公子謹為三老而問道焉初禁
報讎犯者以殺人論壬戌詔百官及庶人上封事極言

得失五月甲午朔以旱故避正寢不受朝甲戌雨秋七月戊辰行幸原州庚午陳人來聘丁丑幸津門問百姓賜以金帛又賜高年板職各有差降死罪囚一等八月丁未改作路寢九月甲子自原州登隴山丙戌幸同州戊子詔柱國楊忠帥騎一萬與突厥伐齊已丑初令世襲州郡縣者悉改為五等爵州封伯郡封子縣封男冬十月庚戌陳人來聘十二月辛卯車駕至自同州遣太保達奚武率騎三萬出平陽以應楊忠是月有人生子

男而陰在背後如尾兩足指如獸爪有犬生子腰以後分為二身兩尾六足

四年春正月庚申楊忠破齊長城至晉陽而還二月庚寅朔日有蝕之三月庚辰初令百官執笏夏四月癸卯以柱國鄧公竇熾為大宗伯五月壬戌封明帝長子賢為畢國公癸酉以大將軍安武公李穆為柱國丁亥改禮部為司宗大司禮為禮部大司樂為樂部六月庚寅改御伯為納言秋八月丁亥朔日有蝕之詔柱國楊忠

帥師與突厥東伐至北河而還戊子以柱國齊公憲為
雍州牧以許公宇文貴為大司徒九月丁巳以柱國衛
公直為大司空封開府李虎為唐國公若于鳳為徐國
公陳人來聘是月以皇世母閭氏自齊至大赦閏月己
亥以大將軍韋孝寬長孫儉並為柱國冬十月癸亥以
大將軍陸通宇文盛蔡公廣並為柱國甲子詔大冢宰
晉公護伐齊帝齋於太廟庭授以斧鉞

周書宇文護傳載詔曰太祖丕授天明造我周室高

氏乘釁跋扈竊有并冀世濟其惡腥穢彰聞皇天震怒假手突厥驅略汾晉掃地無遺坐待滅亡鑒之愚智故突厥班師仍屯彼境更集諸部傾國齊至星流電擊數道俱進期在仲冬同會并鄴大冢宰晉公朕之懿昆惟公是屬朕當親執斧鉞廟庭祇受有司宜勒衆軍量程赴集進止遲速委公處分

於是護總大軍出潼關大將軍權景宣帥山南諸軍出豫州少師楊樹出軹關丁卯帝幸沙苑勞師癸酉還宮

十一月甲午柱國尉遲廻圍洛陽柱國齊公憲營芒山
晉公護次陝州十二月丙辰齊豫州刺史王士良以州
降壬戌齊師渡河晨至洛陽諸軍驚散尉遲廻帥麾下
數十騎扞敵得却至夜引還柱國王雄力戰死之遂班
師楊柵於軹關戰沒權景宣亦棄豫州而還是歲突厥
粟特焉耆等國並遣使朝貢

五年春正月甲申朔以柱國王雄死王事故廢朝辛卯
白虹貫日乙巳以雄世子謙為柱國二月辛丑詔陳公

純等逆皇后於突厥丙寅以柱國李穆為大司空綏德
公陸通為大司寇壬申行幸岐州戊子柱國豆盧寧卒
夏四月齊武成帝禪位太子緯自稱太上皇帝五月丙
戌以皇族父興襲虞國公己亥左右武伯各置中大夫
一人六月庚申彗星出三台入文昌犯上將經紫宮入
苑漸長丈餘百日乃滅辛未詔江陵人年六十五已上
為官奴婢者已令放免其公私奴婢年七十以外者所
在官私宜贖為庶人秋七月辛巳朔日有蝕之庚寅行

幸秦州降死罪已下刑辛丑遣大使巡察天下八月丙子車駕至自秦州九月益州獻三足烏冬十月辛亥改函谷關城為通洛坊十一月庚辰岐州上言一角獸見丁未陳人來聘是歲吐谷渾遣使朝貢

是歲齊後主緯天統元年

天和元年春正月己卯朔日有蝕之辛巳考路寢命羣臣賦古詩京邑耆老亦會焉頒賜各有差癸未大赦改元百官普加四級己亥親耕籍田丁未於宕昌國置宕

州遣小載師杜果使於陳二月戊辰詔三公已下各舉所知庚午日闕光遂微日中見烏三月丙午祀南郊夏四月辛亥雩甲子日有交暈白虹貫之是月陳文帝殂五月庚辰帝御正武殿集羣臣親講禮記吐谷渾龍涸王莫昌率戶內附以其地為扶州甲午詔曰甲子乙卯禮云不樂長弘表昆吾之稔杜蕢有揚解之文自世道喪亂禮儀紊毀此典茫然已墜於地宜依是日省事停樂庶知為君之難為臣不易貽之後昆殷鑒斯在六月

丙午以大將軍辛威為柱國秋七月戊寅築武功郿斜谷武都留谷津坑諸城以置軍民壬午詔諸胄子入學但束脩於師不勞釋奠釋奠者學成之祭自今為恒式八月己未詔諸有三年喪或負土成墳或寢苫骨立一志一行可稱揚者本部官司隨事上言當加弔勉以勵薄俗九月乙亥信州蠻反詔開府陸騰討平之冬十月甲子初造山雲儼以備六代樂十一月丙戌行幸武功等城十二月庚申還宮

是歲陳天康元年

二年春正月癸酉朔日有蝕之己亥親耕籍田三月癸酉改武遊園為道會苑丁亥初立郊丘壇壝制度夏四月乙巳省併東南諸州以大將軍陳公純為柱國五月丁丑進封安武公李穆為申國公六月辛亥尊所生叱奴氏為皇太后閏月庚午地震戊寅陳湘州刺史華皎帥衆來附遣衛國公直等援之因而南伐壬辰以大將軍譙公儉為柱國秋七月辛丑梁州上言鳳凰集樞樹

羣鳥列侍萬數甲辰立路門學置生七十二人九月衛
公直等與陳將淳于量吳明徹戰於沌口王師敗績元
定以步騎數千先渡遂沒江南冬十一月戊戌朔日有
蝕之癸丑太保許國公宇文貴卒

冊府元龜載是年省掖庭四夸樂後宮羅綺宮人五
百餘人

是歲突厥吐谷渾安息等國並遣使朝貢

是歲陳主伯宗光大元年

三年春正月辛丑祀南郊二月丁卯幸武功丁亥還宮
三月癸卯皇后阿史那氏至自突厥甲辰大赦丁未大
會百寮及賓客於路寢戊午太傅燕公于謹卒夏四月
辛巳以太保達奚武為太傅大司馬尉遲迴為太保柱
國齊公憲為大司馬五月庚戌享太廟庚申幸醴泉宮
六月甲戌有星孛於東井秋七月壬寅柱國隋公楊忠
薨戊午車駕還宮八月乙丑韓公元羅薨齊人來聘請
和親詔軍司馬陸逞報聘癸酉帝御大德殿集百寮及

沙門道士等親講禮記冬十月癸亥享太廟丁亥帝親帥六軍講武於城南京邑觀者車馬彌漫數十里諸蕃使咸在焉十一月壬辰朔日有食之甲辰幸岐陽壬子遣開府崔彥穆使於齊甲寅陳安成王頊廢其主伯宗而自立十二月丁丑車駕還宮是月齊武成帝殂

四年春正月辛卯朔以齊武成殂故廢朝遣司會李綸等會葬於齊二月戊辰帝御大德殿集百寮道士沙門等討論釋老夏四月己巳齊人來聘五月己丑帝製象

經成集百寮講說封魏廣平公子元謙為韓國公以紹
魏後

愚考新唐書宰相世系圖乃知謙為西魏廣平公贊
子孝文帝玄孫

丁巳柱國吳公尉遲綱卒六月築原州及涇州東城秋
七月車駕還宮丁巳突厥遣使獻馬柱國昌寧公長孫
儉卒

是歲陳孝宣帝太建元年

五年春二月己巳封邵惠公孫胄為邵國公三月辛卯
進封柱國韋孝寬為鄆國公甲辰初令宿衛官員往闕
外者將家累入京不樂者解宿衛夏四月甲寅以柱國
宇文盛為大宗伯辛醴泉宮省帥都督官丙寅遣大使
巡察天下六月壬辰封開府梁睿為蔣國公丙子以皇
女生故降宥罪人并免逋租懸調七月車駕還宮冬十
月辛巳朔日有蝕之丁酉太傅鄭公達奚武卒十一月
乙丑追封章武公導為豳國公丁卯柱國豳公廣薨十

二月癸巳大將軍鄭恪帥師平越雋置西寧州是月齊將斛律光侵邊於汾北築城自華谷至龍門

是歲齊武平元年

六年春正月己酉朔以路門未成故廢朝詔齊公憲率師禦斛律光丁卯以大將軍王傑譚公會鴈門公田弘魏公李暉等並為柱國三月己酉齊公憲自龍門渡河斛律光退保華谷憲攻拔其新築五城夏四月戊寅朔日有蝕之辛卯信州蠻反遣大將軍趙閭帥師討平之

庚子以大將軍司馬消難侯莫陳瓊大安公閭慶神武
公竇毅南陽公叱羅協平高公侯伏侯龍恩並為柱國
封開府斛斯徵為岐國公右宮伯長孫覽為薛國公五
月癸亥遣納言鄭詡使於陳丙寅以大將軍李虎中山
公訓杞公亮上庸公陸騰安義公宇文邕北平公冠紹
許公宇文善犍為公高琳鄭公達奚震隴東公楊纂常
山公于翼並為柱國六月乙未以大將軍太原公王肅
為柱國是月齊將段韶攻陷汾州秋七月乙丑以大將

軍越公盛為柱國八月癸酉省掖庭四夷樂後宮羅綺
工五百餘人冬十月壬午冀公通薨乙未遣右武伯谷
會琨使於齊壬寅帝親帥六軍講武城南十一月壬子
以大將軍侯莫陳芮大將軍李意並為柱國丙辰齊人
來聘丁巳行幸散關十二月己丑還宮是冬牛疫死者
十六七

建德元年春正月戊午帝幸立都觀親御法座講說公
卿道俗論難事畢還宮降死罪及流罪一等其五歲刑

已下並宥之二月癸酉遣大將軍昌城公深使於突厥
司宗李際使於齊乙酉柱國安義公宇文邕薨二月癸
卯朔日有蝕之齊人來聘丙辰誅大冢宰晉公護及其
子柱國譚公會并柱國侯伏侯龍恩及其弟大將軍萬
壽大將軍劉勇等大赦改元

周書宇文護傳載詔曰太師大冢宰晉公護地實宗
親義兼家國爰初草創同濟艱難遂任總朝權寄深
家國不能竭其誠効罄以心力盡事君之節申送往

之情朕兄故略陽公英風神機禮歸當辟遺訓在耳
忍害先加永尋摧割貫切骨髓世宗明皇帝聰明神
武護內懷凶悖外託尊崇凡厥臣民誰無怨憤朕纂
承洪基十有三載委政師輔責成宰司護志在無君
義違臣節懷茲螫毒逞彼狼心任情誅暴肆行威福
朋黨相煽貨賄公行所好加毛羽所惡生瘡痍朕約
已罪躬情存庶政每恩施寬惠下輒抑而不行遂使
戶口彫殘征賦勞劇家無日給民不聊生且三方未

定邊隅尚阻疆場待車旗之備武夫資扞城之力侯
伏侯龍恩萬壽劉勇等未効勲庸先居上將高門峻
宇甲第雕牆實繁有徒同惡相濟百姓嗷嗷含生業
業嘗恐七百之基忽焉顛墜億兆之命一旦阽危上
累祖宗之靈下負蒼生之責今肅正典刑護已即罪
其餘凶黨咸亦伏誅氛霧既清遐邇同慶可大赦天
下改天和七年為建德元年

罷中外府癸亥以太傅尉遲迴為太師柱國竇熾為太

傳大司空李穆為太保齊公憲為大冢宰衛公直為大
司徒趙公招為大司空柱國辛威為大司寇綏德公陸
通為大司馬詔曰民亦勞止則星動於天作事不時則
石言於國頃興造無度徵發不已加以頻歲師旅農畝
廢業去秋災蝗年穀不登自今正調外無妄徵發夏四
月甲戌以代公達滕公逌並為柱國己卯詔公卿已下
各舉所知遣工部代公達使於齊丙戌詔百官軍民上
封事極言得失丁亥詔斷四方非常貢獻庚寅追尊略

陽公為孝閔皇帝癸巳立魯公贊為皇太子大赦百官
各加封級五月封衛公直長子賓為莒國公紹莒莊公
洛生後壬戌以大旱集百寮於庭詔之曰亢陽不雨豈
朕德薄刑賞乖中歟將公卿大臣或非其人歟宜盡直
言無有所隱公卿各引咎自責其夜澍雨六月庚子改
置宿衛官員秋七月辛丑陳人來聘九月庚子朔日有
蝕之庚申扶風掘地得玉盃以獻冬十月庚午詔江陵
所獲俘虜充官口者悉免為民辛未遣小匠師楊勰使

於陳大司馬綏德公陸通卒十一月丙午帝親御六軍
講武於城南庚戌行幸羗橋集京城以東諸都督以上
頒賜各有差乙卯還宮壬戌以大司空趙公招為大司
馬十二月壬申行幸斜谷集京城以西諸軍都督以上
頒賜有差丙戌還宮己丑帝御正武殿親錄囚徒至夜
罷庚寅幸道會苑以上善殿壯麗遂焚之

隋書五行志曰是年濮陽郡有石像郡官令載向府
將刮取金在道自躍投地如是者再乃以大繩縛著

車壁又絕繩而下

二年春正月辛丑祀南郊乙巳以柱國田弘為大司空
大將軍若于鳳為柱國庚戌復置帥都督官乙卯享太
廟閏月己巳陳人來聘二月辛亥白虹貫日甲寅詔皇
子贊巡撫西土壬戌遣司會侯莫陳凱使於齊省雍州
內八部併入京兆馮詡扶風咸陽等郡三月己卯皇太
子於岐州獲白鹿二以獻詔答曰在德不在瑞癸巳省
六府諸司中大夫以下官府置四司以下大夫為官之

長上士貳之夏四月己亥享太廟丙辰增改東宮官員
五月丁丑以柱國侯莫陳瓊為大宗伯滎陽公司馬消
難為大司寇上庸公陸騰為大司空六月庚子省六府
員外諸官皆為丞士子皇孫衍生文武官普加一級大
階大選諸軍將帥丙辰帝御路寢集諸軍將勛以戎事
庚申詔諸軍旗旌皆畫猛虎驚鳥之狀秋七月己巳享
太廟自春末不雨至是月壬申集百寮於大德殿帝責
躬罪已問以時政得失戊子雨八月丙午改三夫人為

三妃闕中大蝗九月乙丑陳人來聘戊寅詔以頃者婚
嫁競為奢靡有司宜加宣勒使遵禮制壬午納皇太子
妃楊氏冬十月癸卯齊人來聘甲辰奏六代樂成帝御
崇信殿集百官觀之十一月辛巳帝親帥六軍講武城
東癸未集諸軍都督以上五十人於道會苑大射帝親
臨射堂大備軍容十二月癸巳集羣官及沙門道士等
帝升高座辨三教先後以儒教為先道教次之佛教為
後以大將軍赫連達為柱國詔軍民間年多耆壽可頒

授老職使榮沾邑里戊午聽訟於正武殿自旦及夜繼之以燭

三年春正月壬戌朝羣臣於路門進柱國齊公憲衛公直趙公招譙公儉陳公純越公盛代公達滕公道爵為王己巳享太廟庚午突厥遣使獻馬癸酉詔自今男年十五女年十三以上爰及鰥寡所在以時嫁娶務從節儉乙亥親耕籍田丙子初服短衣享二十四軍督將以下試以軍旅之法縱酒盡歡詔以往歲年穀不登令公

私道俗凡有貯積粟麥者皆準口聽留已外盡糶二月
壬辰朔日有蝕之丁酉紀公康畢公賢鄆公貞宋公實
漢公贊秦公贊曹公允並進爵為王丙午令六府各舉
賢良清正之士癸丑柱國許公宇文善有罪免乙卯幸
雲陽宮丙辰大赦三月辛酉車駕還宮癸酉皇太后叱
奴氏崩帝居倚廬朝夕供一溢米羣臣表請累旬乃止
詔皇太子贊總庶政夏四月乙卯齊人來弔賜會葬丁
巳有星孛於東井五月庚申英文宣后於永固陵帝袒

既至陵所辛酉詔曰齊斬之情經籍彛訓近代沿革遂
亡斯禮伏奉遺令既葬便除攀慕几延情實未忍三年
之喪達於天子古今無易之道王者所常行但時有未
諧不得全制軍國務重庶有聽朝衰麻之節苦廬之禮
率遵前典以申罔極百寮已下宜遵遺令公卿上表固
請俯就權制過葬即吉帝不許引古答之羣臣乃止遂
申三年之制五服內亦令依禮初置太子諫議員四人
文學十人皇子皇弟友員各二人學士六人戊辰詔故

晉公護及諸子追復先封改葬加諡初斷佛道二教經像悉毀罷沙門道士並令還俗

佛藏曰帝將廢佛法集衆僧名儒道士文武二千餘人會議者四時見帝精悟明鑒內烈外溫皆莫敢爭獨僧靜藹智炫爭之甚力智炫至云今欲廢佛存道猶以庶代嫡帝生母叱奴太后也帝作色入內終不聽然亦不罪明旦出勅二教俱廢靜藹憤法淪沒以刀刺心死智炫尋遁齋

隋書五行志曰齊後主時有桑門貌如狂人見鳥則向之作禮見沙門則毆辱之烏周色未幾周滅齊除佛法

并禁諸淫祀非祀典所載者盡除之六月丁未集諸軍將教以戰陣之法壬子更鑄五行大布錢以一當十與布泉錢並行戊午詔曰至道弘深混成無際體包空有理極幽玄但岐路既分源流逾遠淳離朴散形器斯乖遂使三墨八儒朱紫交競九流七畧異說相騰道隱小

成其來舊矣不有會歸爭驅靡息今可立通道觀聖哲
微言先賢訓典金科玉篆秘蹟玄文可以濟養黎元扶
成教義者並宜弘闡一以貫之俾夫翫培塿者識嵩岱
之崇崛守磧礫者悟渤澥之泓澄不亦可乎

佛藏曰周武雖滅二教意存道術乃置通道觀學士
三百人並選佛道兩宗奇才俊邁者充之不久廢觀
聽士隨才賦任

秋七月庚申行幸雲陽宮乙酉衛王直在京反欲突入

蒲章門司武尉遲運等拒守直敗遁走戊子車駕還宮
八月辛卯擒直於荊州免為庶人丙申幸雲陽宮冬十
月丙申詔御正楊尚希使於陳庚子詔蒲州民遭飢乏
絕者令向郿城以西及荊州管內就食甲寅幸蒲州乙
卯曲赦蒲州見囚大辟以下丙辰幸同州十一月戊午
子闡遣使獻名馬己巳大閱於同州城東甲戌車駕至
自同州十二月戊子大會衛官及軍民以上賜錢帛各
有差丙申改諸軍軍人並名侍官癸卯集諸軍講武於

臨臯澤涼州比年地震壞城郭地裂涌泉出

四年春正月戊辰初置營軍器監壬申詔刺史守令親
勸農桑事非機要悉停至秋布寬大之令多所蠲免癸
酉幸同州二月丙戌朔日有蝕之辛卯改置宿衛官員
己酉柱國廣德公李意有罪免三月丙辰遣小司寇元
偉使於齊郡縣各省主簿一人丙寅車駕還宮甲戌以
柱國趙王招為雍州牧夏四月甲午柱國燕公于寶有
罪免丁酉初令上書者並為表於皇太子以下稱啟秋

七月丙辰幸雲陽宮己未禁五行大布錢不得出入關
布泉錢聽入而不聽出丁卯車駕還宮甲戌陳人來聘
丙子召大將軍以上於大德殿帝親諭以伐齊之旨言
往以政出權宰無所措懷自親覽萬機便圖東討惡衣
菲食繕甲練兵數年以來戰備稍足而偽主昏虐恣行
無道伐暴除亂斯實其時

周書又載帝言曰今欲數道出兵水陸並進北拒太
行之路東扼黎陽之險若東拔河陰充豫馳檄可定

然後養銳享士以待其至但得一戰破之必矣

羣臣咸稱善丁丑下詔暴齊氏過惡

周書載詔曰高氏因時放命據有汾漳擅假名器歷年永久朕以亭毒為心遂敦聘好而彼懷惡不悛背言負信竊邑藏奸往者軍下宜陽蒙由彼始兵興汾曲事非我先此獲俘囚禮送相繼彼所拘執曾無一反加以淫刑妄逞毒賦繁興齊魯軫殄悴之哀幽并啟來蘇之望既禍盈惡稔衆叛親離不有一戎何以

大定今白藏在辰涼風戒節朕當躬御六師恭行天
罰庶憑祖宗之靈潛資將士之力風馳九有電掃八
紘可分命衆軍指期進發

以柱國陳王純為前一軍總管司馬消難為前二軍總
管鄭公達奚震為前三軍總管越王盛為後一軍總管
周昌公侯莫陳瓊為後二軍總管趙王招為後三軍總
管齊王憲帥衆二萬趣黎陽隋公楊堅廣寧公侯莫陳
廻帥舟師三萬自渭入河柱國梁公侯莫陳芮帥衆一

萬守太行道申國公李穆帥衆三萬守河陽道常山公
于翼帥衆二萬出陳汝壬午帝親帥六軍衆六萬直指
河陰八月癸卯入齊境禁伐樹殘苗稼犯者以軍法從
事丁未帝親帥諸軍攻拔河陰大城攻子城未剋帝有
疾九月辛酉夜班師水軍焚舟而退齊王憲于翼李穆
等所在剋捷降拔三十餘城皆棄而不守唯以王藥城
要害令儀同三司韓正守之正尋以城降齊戊寅至自
東伐冬十月戊子初置上柱國上大將軍官改開府儀

同三司為開府儀同大將軍又置上開府上儀同官甲
午幸同州閏月以柱國齊王憲蜀公尉遲迴為上柱國
滎陽公司馬消難為梁州總管詔諸畿郡各舉賢良十
一月己亥改置司內官員十二月辛亥朔日有蝕之庚
午車駕還宮丙子陳人來聘是歲岐寧二州民饑詔開
倉賑恤

五年春正月辛卯行幸河東涑川集闕河東諸軍校獵
甲午還同州丁酉詔分遣大使周省四方察訟聽謠問

民卹隱廢布泉錢戊申初令鑄錢者至絞從者遠配二月辛酉遣皇太子贊廵撫西土仍討吐谷渾三月壬寅車駕至自同州文宣皇太后服再朞戊申祥夏四月乙卯幸同州五月壬辰還宮六月戊申朔日有食之辛亥享太廟丙辰利州總管紀王康有罪賜死丁巳幸雲陽宮秋七月乙未京師旱八月戊申皇太子伐吐谷渾至伏俟城而還乙卯車駕還宮乙丑陳人來聘九月丁丑大醮正武殿以祈東伐冬十月帝復諭羣臣曰朕去歲

屬有疹疾遂不得剋平逋寇

周書載帝言曰前入賊境備見敵情觀彼行師殆同
兒戲又聞其朝政昏亂政由羣小百姓嗷然朝不謀
夕天與不取恐貽後悔

于時出軍河外直為撫背未扼其喉然晉州本高歡所
起統攝要重今往攻之彼必來援嚴軍以待擊之必剋
然後乘破竹之勢鼓行而東足以窮其窟穴諸將多不
願行帝曰機者事之微不可失沮軍事者以軍法裁之

已酉帝總戎東伐以越王盛為右軍總管令杞公亮為
右二軍總管隋公楊堅為右三軍總管譙王儉為左一
軍總管大將軍竇泰為左二軍總管廣化公邱崇為左
三軍總管齊王憲陳王純為前軍癸亥帝至晉州遣齊
王憲帥精騎二萬守雀鼠谷陳王純步騎二萬守千里
徑鄭公達奚震步騎一萬守統軍川大將軍韓明步兵
五千守齊子嶺烏氏公尹升步騎五千守鼓鍾鎮涼城
公辛韶步騎千守蒲津關柱國趙王招步騎一萬自華

谷攻汾州諸城柱國宇文盛步騎兵一萬守汾水關遣
內史王誼監六軍攻晉州城帝屯於汾曲齊王憲攻洪
洞永安二城並拔之是夜虹見於晉州城上首向南尾
入紫宮帝每日自汾曲赴城下親督戰庚午齊行臺左
丞侯子欽出降壬申齊晉州刺史崔嵩夜密使送款上
開府王軌應之未明登城遂剋晉州甲戌以上開府梁
士彥為晉州刺史鎮之十一月己卯齊主自并州帥衆
來援帝以其兵新集且避之詔諸軍班師齊主遂圍晉

州齊王憲屯諸軍於涑水為晉州聲援河東地震癸巳至自東伐獻俘於太廟

周書載冬十一月甲午詔曰偽齊違信背約惡稔禍盈是以親總六師問罪汾晉兵威所及莫不摧殄賊衆危惶烏栖自固暨元戎反旆方來聚結遊魂境首尚敢趑趄朕方更率諸軍應機除剪

丙申放齊諸城鎮降人還丁酉帝發京師壬寅渡河與諸軍合十二月戊申次晉州庚戌帝帥諸軍八萬置陣

東西二十餘里乘常御馬從數人巡陣所至輒呼主帥姓名慰勉之將士感見知各思自厲將戰有司請換馬帝曰朕獨乘良馬何所之齊主亦於塹北列陣

周書曰初齊攻晉州恐王師猝至於城南穿塹自喬山臨汾水

申後齊人填塹南引帝大喜勸諸軍擊之齊人便退齊主與其麾下數十騎走還并州齊衆大潰軍資甲仗數百里間委棄山積辛亥帝幸晉州仍率諸軍追齊主諸

將固請還師帝曰縱敵患生卿等若疑朕將獨往諸將不敢言甲寅齊主遣其丞相高阿那肱守高壁帝麾軍直進那肱望風退散丙辰師次介休齊將韓建業舉城降以為上柱國封郇國公丁巳大軍次并州齊主留其從兄安德王延宗守并州自將輕騎走鄴是月詔齊王公以下示以順逆之道

冊府元龜載詔曰朕經臨萬國志清四海嗟彼齊趙獨為匪氓乃眷東顧載深長思偽主高緯涼德早聞

醜聲夙著酒色是耽盤遊是悅閹監居阿衡之位胡
人寄唇吻之重棟梁骨鯁剪為仇讐狐趙餘緒降為
阜隸民不見德唯虐是聞朕懷茲漏網置之度外欲
各靜封疆而爾之主相反搆厲階惟幄獻兼弱之謀
爪牙奮干戈之勇羸糧裹甲若赴私仇是以一鼓而
定晉川再舉而摧逋醜偽丞相高阿那肱驅逼餘燼
竊據高壁偽定南王韓建業作守介休規相抗擬聊
示兵威應時崩潰或單馬宵遁或面縛軍門若懷遠

以德則爾難德綏若處隣以義則爾難義服朕親馭
羣雄長驅海內大軍舒旆萬隊啟行望歲之民室家
相慶來蘇之后思副厥成僞主若妙盡人謀深達天
命當惠以焚覲待以列侯偽相王公以下衣冠士民
之族如有深知事宜建功立效官榮爵賞各有加隆
執迷不改則委之執憲以正刑書嗟爾士庶胡寧自
棄善求多福無貽後悔

於是齊將帥降者相繼封其特進賀拔伏恩為都國公

餘官爵有差戊午高延宗僭即偽位改年德昌己未軍次并州帝帥諸軍合戰齊人退帝逐北及城東門諸軍遶城置陣至夜延宗帥其衆排陣而前城中軍却人相蹂踐大為延宗所敗齊人欲閉門以閘下積尸靡不得闔帝從數騎崎嶇危險僅得出門至明

資治通鑑曰帝駐馬鳴角收兵

帥諸軍更戰大破之擒延宗并州平壬戌詔曰昔天厭水運龍戰於野兩京否隔四紀於茲朕垂拱巖廊君臨

字縣相邠人於海內混楚弓於天下一物失所有若推
溝方欲德綏未服義征不諛僞主高緯放命燕齊怠慢
典刑俶擾天紀加以背惠怒隣棄信忘義朕應天從物
伐罪弔民一鼓而蕩平陽再舉而摧強敵僞署王公相
繼道左高緯智窮數屈逃竄草間僞安德王高延宗擾
攘之間遂竊名號與僞齊昌王莫多婁敬顯等收合餘
燼背城借一王威既振魚潰鳥離破竹更難建瓴非易
延宗衆散衿甲軍門根本既傾枝葉自實幽青海岱折

簡而來冀北河南傳檄可定八紘共貫六合同風方當
偃伯靈臺休牛桃塞無疆之慶非獨在予漢皇約法除
其苛政姬王輕典刑彼新邦思覃惠澤被之率土新集
臣庶皆從蕩滌可大赦天下高緯及王公以下若釋然
歸順咸許自新或我之將卒亡入偽朝亦從寬宥官榮
次序依例無失齊制偽令即宜削除鄒魯搢紳幽并騎
士一介可稱即宜銓錄丙寅出齊宮中金銀寶器珠玉
麗服及宮女二千人班賜將士以柱國趙王招陳王純

越王盛杞公亮梁公侯莫陳芮庸公王謙北平公冠紹
鄭公達奚震並為上柱國封齊王憲子安城郡公質為
河間王

周書載進大將軍廣化公邱崇為潞國公神水公姬
願為原國公廣業公尉遲運為魯國公

諸有功者封授各有差癸酉帝帥六軍趣鄴

是歲齊隆化元年

六年春正月乙亥齊主傳位於其太子恒改年承光自

號太上皇壬辰帝至鄴癸巳帥諸軍圍之齊人拒守諸軍奮擊大破之遂平鄴

興亡論曰軍令肅然秋毫莫犯數旬而定不戮一人未及下車革其弊政山東士女欣戴如歸

齊主先送其母及妻子於青州及城陷帥數十騎走青州遣大將軍尉遲勤追之是戰也於陣獲其齊昌王莫多婁敬顯帝數之曰汝有死罪三前從并州走鄴棄母攜妻妾不孝外為偽主戮力內實通啟於朕不忠送款

後猶持兩端不信如此用懷不死何待遂斬之是日西方有聲如雷甲午帝入鄴詔去年大赦班宣未及之處皆從赦例封齊開府洛州刺史獨孤永業為應國公己亥詔曰晉州大陣至鄴身殞戰場者其子即授父本官尉遲勤擒齊主及其太子恒於青州庚子詔曰偽齊之末奸佞擅權濫罰淫刑動挂羅網偽右丞相咸陽王斛律光偽侍中特進開府故崔季舒等七人

愚按崔季舒為權臣高澄心腹奉毆孝靜一死不足

贖何優贈之有

或功高獲罪或直言見誅朕兵以義動剪除凶暴表閭
封墓事切下車宜追贈謚并加寔措其見在子孫各隨
蔭叙錄家口田宅沒官者並還之辛丑詔偽齊東山南
園及三臺並毀撤瓦木諸物凡入用者盡賜百姓山園
之田各還本主

周書載詔曰偽齊叛渙竊有漳濱世縱淫風事窮離
飾或穿池運石為山學海或層臺累構蔽日凌雲以

暴亂之心極奢侈之事有一於此未或弗亡朕菲食
薄衣以弘風教追念生民之費尚想力役之勞方當
易茲輿俗率歸節儉其東山南園及三臺可並毀撤
瓦木諸物凡入用者盡賜下民山園之田各還本主
二月丙午論定諸軍勲置酒於齊太極殿會軍士以上
班賜有差丁未齊主至帝降自阼階見以賓主禮齊任
城王潛在冀州擁兵未下遣上柱國齊王憲與柱國隋
公楊堅討平之齊范陽王高紹義叛入突厥齊諸行臺

州鎮悉降關東平合州五十五郡一百六十二縣三百八十五戶三十萬二千五百二十八口二千萬六千八百八十六乃於河陽及幽青南兗豫徐北朔定州置總管府相并二總管各置官及六府官癸丑詔自偽武平三年以來河南諸州人偽齊破掠為奴婢者不問公私並放免其住在淮南者亦即聽還願住淮北者可隨便安置癰疾孤老不能自存者所在矜恤

周書載詔曰無侮斃獨事顯前書哀彼矜人惠流往

金史卷之八十二
卷之八十二
訓偽齊末政昏虐實繁災甚滔天流毒比屋無罪無
辜係虜三軍之手不飲不食僵仆九達之門朕為民
父母職養黎民念甚泣辜情深罪已除其苛政事屬
改張宜加寬宥兼行賑卹云

乙卯車駕發自鄴丙辰以柱國楊堅為定州總管三月
壬午詔山東諸州各舉士

僧道論衡曰周武平齊復欲除齊地佛法召諸大德
赴殿集議帝升座言曰朕受天命世弘三教儒教禮

義忠信所出故須存立若真佛無像遙敬表心經塔
何情徒為文費且父母恩重沙門不敬朕欲毀經除
塔返沙門於家如何時僧慧遠抗言不可帝不聽下
詔盡除之嘗言以民為子可謂大慈四海為家即同
法界治政以理何異救物安樂百姓寧殊拔苦其持
論如此 厯代三寶記曰周武毀滅佛法前代闕山
西東數百年來所造佛塔掃地悉盡融刮聖容焚滅
經典八州祠廟出四十千盡賜王公充為第宅三方

釋子減三百萬皆復軍民還歸編戶

夏四月乙巳至自東伐列齋主於前其王公等並從車
輿旌旗及器物以次陳於其後備大駕布六軍奏凱樂
獻俘於太廟京邑觀者皆稱萬歲戊申封齊主為溫國
公庚戌大會羣臣及諸蕃客於路廟乙卯廢蒲陝涇寧
四州總管己巳享太廟詔分遣使人廵方撫慰觀風省
俗

冊府元龜載詔曰東夏既平王道初被偽齊弊政餘

風未殄朕劬勞萬機恐下民疾苦不能上達寢興軫慮用切於懷宜分道使人云

五月丁丑以柱國譙王儉為大冢宰庚辰以上柱國杞公亮為大司徒鄭公達奚震為大宗伯梁公侯莫陳芮為大司馬柱國應公獨孤永業為大司寇鄖公韋孝寬為大司空辛巳大醮於正武殿以報功己丑祀方丘詔曰往者冢臣專任制度有違正殿別寢事窮壯麗非直雕墻峻宇深戒前王而締搆弘敞有踰清廟不軌不物

何以示後兼東夏初平人未見德率先海內宜自朕始
其路寢會議崇信舍仁雲和思齊諸殿等農隙之時悉
可撤毀雕斲之物並賜貧民締造之宜務從卑樸癸巳
幸雲陽宮戊戌詔曰京師宮殿已從撤毀並鄴二所華
侈過度誠復作之非我豈容因而弗革諸堂殿壯麗並
可除蕩薨宇雜物分賜貧民三農之隙別寢營構止蔽
風雨務在卑狹庚子陳人來聘是月青城門無故自崩
六月辛亥御正武殿錄囚徒甲子東巡丁卯詔曰自今

不得娶母同姓以為妻妾秋七月己卯封齊王憲第四子廣都公員為莒國公丙戌幸洛州己丑詔山東諸州舉有才望者赴行在所共論政事得失戊戌以上柱國庸公王謙為益州總管八月壬寅議權衡度量頒於天下其不依新式者悉追停之詔曰以刑止刑以輕代重罪不及嗣皆有定科雜役之徒獨異常憲一從罪配百代不免罰既無窮刑何以措凡諸雜戶悉放為民配雜之科因之永削甲子鄭州獻九尾狐皮肉銷盡骨體猶

具帝曰瑞應之來必昭有德若使五品時序四海和平
家識孝慈乃能致此今無其時恐非實錄乃焚之九月
壬申以柱國鄧公竇熾申公李穆為上柱國戊寅初令
庶人以上非朝祭之服唯得衣綢綿綢絲布圓綾紗絹
綃葛布等九種壬辰詔東土諸州儒生明一經以上並
舉送州郡以禮發遣癸卯封上黃公王軌為郟國公冬
十月戊申行幸鄴宮戊午改葬德皇帝於冀州帝服總
哭於太極殿百官素服哭是月誣溫公高緯謀反殺之

夷其族十一月壬申封皇子充為道王允為蔡王癸酉
陳將吳明徹侵呂梁徐州總管梁士彥與戰不利退守
徐州遣上大將軍王軌討之是月稽胡反遣齊王憲討
平之詔自魏永熙三年以來十月以前東土人被鈔在
化內為奴婢者及平江陵日良人沒為奴婢者並免同
民伍詔曰正位於中有聖通典質文相革損益不同五
帝則四星之象三王制六宮之數劉曹已降等列彌繁
選擇偏於生靈命秩方於庶職椒房丹地有衆如雲本

由嗜欲非闕風化朕運當澆季思復古始弘贊後庭事
從簡約可置妃二人世婦三人御妻三人

按詔所云周武嬪御之簡如此然齊孝昭故后元氏
既云入周氏宮而南陽王綽妃鄭氏又云為周武所
幸豈八人中齊已居耶恐未可信

自茲以外宜悉減省己亥晦日有蝕之初行刑書要制
持杖羣強盜一疋以上不持杖羣強盜五疋以上監臨
主掌自盜二十疋以上小盜及詐請官物三十疋以上

正長隱五戶及十丁以上隱地三頃以上皆至死刑書
所不載者自依律科十二月北營州刺史高寶寧據州
起兵庚申行幸并州宮移并州軍人四萬戶於關中丁
卯以隋國公楊堅為南充州刺史戊辰廢并州宮及六
府

隋書五行志曰是年陽武有獸三狀如水牛一黃一
黑一赤赤與黑鬪久之黃者自傍觸之黑者死黑周
所尚色死乃亡象後數年周果滅而隋有天下旌旗

尚赤戎服以黃

是歲吐谷渾百濟並遣使朝貢

是歲齊幼主恒承光元年亡

宣政元年春正月癸酉吐谷渾僞趙王他婁屯來降壬
午行幸鄴宮辛卯幸懷州癸巳幸洛州詔於懷州置宮
二月甲辰柱國大冢宰譙王儉薨丁巳車駕至自東巡
乙丑以上柱國越王盛為大冢宰陳王純為雍州牧三
月戊辰於蒲州置宮廢同州及長春二宮壬申突厥遣

使朝貢甲戌初服常冠以皂紗為之加簪不施纓導其
制若今折角巾云上大將軍王軌破陳師於呂梁擒其
將吳明徹等俘斬三萬餘人丁亥詔柱國豆盧寧征江
南武陵南平等郡所有士庶為人奴婢者悉依江陵放
免壬辰改元夏四月壬子初令遭父母喪聽終制庚申
突厥入寇幽州五月己丑帝總戎北伐遣柱國原公姬
願東平公宇文神舉等五道俱入發闕中公私馬驢悉
從軍癸巳帝不豫止雲陽宮丙申詔停諸軍六月丁酉

帝疾甚還京其夜崩於乘輿時年三十六遺詔曰人肖形天地稟質五常脩短之間莫非命也朕君臨宇縣十有九年未能使百姓安樂刑措不用未旦求衣分宵忘寢昔魏室將季海內分崩太祖扶危翼傾肇開正業燕趙榛蕪又竊名號朕上述先志下順人心遂與王公將帥共平東夏雖復妖氛蕩定而民勞未康每一念此若臨冰谷將欲包舉六合混同文軌今遘疾大漸力氣稍微有志不申以此歎息天下事重萬機不易王公以下

爰及庶寮宜輔導太子副朕遺意令上不負太祖下不失為臣朕雖瞑目九泉無所復恨朕平生居處每存菲薄非訓子孫亦本心所好喪事資用須使儉而合禮墓而不墳自古通典隨吉即葬葬訖公除四方士庶各三日哭妃嬪以下無子者悉放還家上謚曰武皇帝廟號高祖己未葬孝陵帝沉毅有智謀初以晉公護專權常自晦迹人莫測其深淺及護後始親萬機克已勵精聽覽不怠用法嚴整多所罪殺

興亡論曰帝天性嚴忍果於殺戮血流盈前不廢飲
噉尤好田獵從禽非夜不返飛走之類值無免者
帝號令懇惻惟屬意於政羣臣畏服莫不肅然性既明
察少恩惠凡布懷立行皆欲踰越古人身衣布袍寢布
被無金寶之飾諸宮殿華綺者皆撤毀之土階數尺不
施橰拱其雕文刻鏤錦繡纂組一皆禁斷後宮嬪御不
過十餘人

興亡論曰帝屏重肉之膳躬大布之衣始自六官被

於九服令行禁止內外肅然

勞謙接下自強不息以海內未康銳情教習至於校兵
閱武步行山谷履涉勤苦皆人所不堪平齋之役見軍
士有跣行者帝親脫靴賜之每宴會將士必自執盃勸
酒或手付賜物至於征伐躬在行陣性又果決能斷大
事故能得士卒死力以弱制強破齊後遂欲平突厥定
江南一二年間必使天下一統此其志也

佛藏曰帝滅齊後前沙門任道琳表言不宜殘壞太

祖所立寺廟請復佛法帝曰自廢法以來民役稍稀
祖調年增兵師曰盛東平偽齊西定妖戎國樂民安
豈非有益且太祖何以屢討齊不克至朕乃平耶道
琳曰此偶會耳滅桀誅紂豈皆緣壞佛止見道消國
滅未聞兵強祚久帝不聽

宣皇帝諱寶字乾伯武帝長子母李太后武成元年生
於同州保定元年五月丙午封魯國公建德元年四月
癸巳武帝親告廟冠於阼階立為皇太子二年詔皇太

子廵撫西土文宣后崩武帝諒闇詔太子總朝政五旬
罷武帝每廵幸四方太子常留監國五年二月又詔太
子廵西土因討吐谷渾

宣政元年六月丁酉武帝崩戊戌太子即皇帝位尊皇
后曰皇太后甲子害上柱國齊王憲閏月乙亥詔山東
流民新復業及突厥侵掠家口破亡不能存濟者給復
一年立妃楊氏為皇后辛巳以上柱國趙王招為太師
陳王純為太傅柱國代王達滕王適盧公尉遲運薛公

長孫覽並為上柱國是月幽州盧昌期據范陽反詔柱
國東平公宇文神舉討平之秋七月乙巳享太廟丙午
祀圓丘戊申祀方澤庚戌以小宗伯岐公斛斯徵為大
宗伯壬戌以南兗州總管隋公楊堅為上柱國大司馬
癸亥尊所生李氏為帝太后八月丙寅夕月於西郊長
安萬年二縣民居京城者給復三年壬申幸同州遣大
使巡察諸州制九條

周書載曰一曰決獄科罪皆准律文二曰母族絕服

外者聽婚三曰以杖決罰悉令依法四曰郡縣當境
賊盜不擒獲者並仰錄奏五曰孝子順孫義夫節婦
表其門閭才堪任用者即宜申薦六曰或昔經驅使
名位未達或沉淪蓬華文武可施宜並採訪具以名
奏七曰偽齊七品已上敕收用八品以下爰及流外
若欲入仕皆聽預選降二等授官八曰州舉高才博
學者為秀才郡舉經明行脩者為孝廉上州郡歲一
人下州郡三歲一人九曰年七十以上依式授官鰥

寡困乏不能自存者並加稟恤

宣下州郡以上柱國薛公長孫覽為大司徒柱國楊公
王誼為大司空丙戌以柱國永昌公椿為大司寇九月
丁酉以柱國宇文盛張掖公王傑杞罕公辛威鄖國公
韋孝寬並為上柱國庚戌封皇弟元為荆王詔諸應拜
者皆以三拜成禮冬十月癸酉至自同州十一月己亥
講武道會苑帝親擐甲胄是月突厥犯邊圍酒泉殺掠
吏民十二月甲子以柱國畢王賢為大司空己丑以上

柱國河陽總管滕王道為行軍元帥伐陳免京師見徒
令從軍是歲百濟遣使朝貢

大象元年春正月己丑受朝於路門帝服通天冠絳紗
袍羣臣皆服漢魏衣冠大赦改元大成初置四輔官以
大象宰越王盛為大前疑蜀公尉遲迴為大右弼申公
李穆為大左輔大司馬隋公楊堅為大後丞癸卯封皇
子衍為魯王甲辰東巡丙午以柱國常山公于翼為大
司徒辛亥以柱國許公宇文善為大宗伯戊午行幸洛

陽立魯王行為皇太子二月癸亥詔曰河洛之地舊稱
朝市魏氏失馭城闕為墟我太祖受命豐鎬有懷光宅
高祖往廵東夏布政此宮朕以眇身祇承寶運庶幾聿
修之志敢忘燕翼之心昨佇蹕金墉備嘗遊覽百王制
度基址尚存今若因循為功易立宜命邦事修復舊都
奢儉取文質之間功役因子來之義北瞻河內咫尺非
遙前詔經營今宜停罷於是發山東諸州兵增一月功
為四十五日役起洛陽宮常役四萬人以迄晏駕并移

相州六府於洛陽稱東京六府殺柱國徐州總管王軌
停南討諸軍以趙王招女為千金公主嫁於突厥乙亥
行幸鄴丙子初令總管刺史行兵者加持節餘悉罷之
辛巳詔傳位於皇太子衍

周書載詔曰朕以寡薄祇承鴻緒思隆國本用弘天
歷皇太子衍地居上嗣正統所歸遠憑積德之休允
協無疆之祚帝王之量未肅而成天祿之期不謀已
至今傳位於衍乃賤四海深合謳歌之望俾予一人

高蹈風塵之表萬方兆庶知朕意焉

大赦改元大成為大象帝於是自稱天元皇帝所居稱
天臺冕二十有四旒車服旗鼓皆以二十四為節內史
御正皆置上大夫皇帝行稱正陽宮置納言御正諸衛
等官皆准天臺尊皇太后為天元皇太后封內史上大
夫鄭譯為沛國公癸未日出將入時其中並有烏色大
如雞卵經四日乃滅戊子以大前疑越主盛為太傅大
右弼尉遲廻為大前疑尋出為相州總管代王達為大

右弼辛卯詔徙鄴石經於洛陽又詔洛陽凡是元遷戶
並聽還洛州此外欲往者聽之河陽幽相豫亳青徐七
總管受東京六府處分三月庚申車駕至自東巡大陳
軍伍親掇甲冑入自青門皇帝行備法駕從百官迎於
青門外是時驟雨儀衛失容辛酉封趙王招第二子貴
為永康縣王

夏四月壬戌朔有司奏言日蝕不視事過時不食乃臨
軒立妃朱氏為天元皇后癸亥以柱國畢王賢為上柱

國已已享太廟壬午大醮於正武殿五月辛亥以洛州
襄國郡為趙國齊州濟南郡為陳國豐州武當安富二
郡為越國潞州上黨郡為代國荊州新野郡為滕國邑
各一萬戶令趙王招陳王純越王盛代王達滕王迥並
之國是月遣使簡視京城及諸州士庶女充選後宮突
厥寇并州六月咸陽有池水變為血徵山東諸州民修
長城秋七月庚寅以大司空畢王賢為雍州牧大後丞
隋公楊堅為大前疑柱國榮陽公司馬消難為大後丞

丙申納大後丞司馬消難女為正陽宮皇后已酉尊帝
太后李氏為天皇太后壬子改天元帝后朱氏為天皇
后立妃元氏為天右皇后妃陳氏為天左皇后八月庚
申幸同州壬申還宮甲戌以天左皇后父大將軍陳山
提天右皇后父開府元晟並為上柱國山提封鄴國公
晟封翼國公初武帝作刑書要制用法嚴重及帝即位
恐物情未附除之至是為刑經聖制其法深刻

隋書刑法志曰周宣殘暴初即位首誅功王重臣內

外危懼帝恐失衆心乃行寬法數行肆赦為姦者皆輕犯法於是又廣高祖刑書要制而更峻其法謂之

刑經聖制

大醮於正武殿告天而行壬午以上柱國雍州牧畢王賢為太師上柱國郇公韓建業為大左輔是月所在螳羣鬪各四五尺死者十八九九月己卯以鄆王貞為大冢宰上柱國郇公韋孝寬為行軍元帥率行軍總管杞公亮郈公梁士彥伐陳遣御正杜杲等使於陳冬十月

壬戌幸道會苑大醺以高祖武皇帝配醺初復佛像及天尊像帝與二像俱南坐大陳雜戲令京城士庶縱觀是月相州人段德舉謀反伏誅十一月乙未幸渦陽戊戌幸同州壬寅還宮乙巳初鑄永通萬國錢以一當千與五行大布並行是月韋孝寬拔壽陽杞國公亮拔黃城梁士彥拔廣陵陳人退走江北盡平十二月戊午以災異屢見帝御路寢見百官詔曰朕以寡德君臨區宇至有金入南斗木犯軒轅熒惑干房又與土合流星照

夜東南而下然則南斗主於爵祿軒轅為於後宮房曰
夫明堂布政所也火土則憂孽之兆流星為兵凶之驗
豈其宮人失序女謁尚行政事乖方憂患將至何其昭
著若斯之甚將避正殿齋居克念惡衣減膳去飾徹懸
披不諱之誠開直言之路欲使刑不濫及賞弗踰等選
舉以才官闡脩德宜宣諸內外庶盡弼諧允叶人心用
消天譴於是舍仗衛往天興宮百官上表勸復寢膳許
之甲子還宮御正武殿集百官及宮人內外命婦大列

妓樂又縱胡人乞寒用水澆沃以為戲樂乙丑行幸洛陽帝親御驛馬日行三百里四皇后及文武侍衛數百人並乘駟從令四后方駕齊驅或有先後便加譴責人馬頓仆相屬於道己卯還宮

二年春正月丁亥帝受朝於道會苑癸巳享太廟乙巳造二展畫日月像以置左右戊申雨雪雪止又雨細黃土移時乃息乙卯詔江西諸州新附民給復二十年初稅入市者人一錢二月丁巳帝幸路門學行釋奠禮戊

金史卷一百一十五
午突厥遣使獻方物且逆千金公主乙丑改制詔為天
制敕為天敕尊天元皇太后為天元上皇太后天皇太
后李氏為天元聖皇太后癸未立天元皇后楊氏為天
元大皇后天皇后朱氏為天大皇后天右皇后元氏為
天右大皇后天左皇后陳氏為天左大皇后正陽宮皇
后直稱皇后是月洛陽有禿鶩鳥集新太極殿前榮州
有黑龍見與赤龍鬪於汴水側黑龍死三月丁亥賜百
官及百姓大酺詔進封孔子為鄒國公邑數準舊并立

後承襲別於京師置廟以時祭奠

周書載詔曰孔子德惟藏往道實生知以大聖之才
屬千古之運載弘儒業式叙彝倫至如幽贊天人之
理裁成禮樂之務故以作範百王垂風萬葉朕欽承
寶厯服膺禮義眷言洙泗懷道滋深且褒成啟號雖
彰故實旌崇聖績猶有闕如可追封鄒國公邑數准
舊并立後承襲別於京師置廟以時祭享

戊子行軍總管杞公亮舉兵反行軍元帥韋孝寬獲而

殺之辛卯以永昌公椿為杞國公紹簡公連後行幸同
州增侯正前驅式道為三百六十重自應門至赤岸澤
數十里間幡旗相蔽鼓樂俱作又令武賁執鉞馬上稱
警蹕以至同州乙未改同州宮為天成宮庚子車駕至
自同州詔天臺侍衛皆着五色及紅紫綠衣以雜色為
緣名曰品色衣有大事與公服間服之壬寅詔内外命
婦皆執笏其拜宗廟及天臺皆俛伏

興亡論曰内外命婦朔望朝謁皆令為丈夫拜伏以

示肅恭

甲辰初置天中大皇后立天左大皇后陳氏為天中大
皇后立妃尉遲氏為天左大皇后夏四月己巳享太廟
己卯以旱故降囚死罪己下壬午幸中山祈雨至咸陽
宮雨降甲申還宮令京城士女於衢巷作音樂迎候五
月甲午帝備法駕幸天興宮乙未帝不愈還宮楊州總
管隋公楊堅入侍疾丁未追趙越陳代滕五王入朝己
酉大漸御正下大夫劉昉與內史上大夫鄭譯矯制以

隋公楊堅受遺輔政是日帝崩於天德殿時年二十二
謚曰宣皇帝七月丙申葬定陵

隋書五行志曰周宣帝與宮人連臂蹋蹀歌曰自知
身命促把燭夜行遊果即位二年崩

帝在東宮武帝慮其不堪承嗣遇之甚嚴朝見進止與
諸臣無異雖隆寒盛暑亦不得休息性嗜酒武帝遂禁
醪醴不許至東宮每有過輒加捶扑嘗謂之曰古來太
子被廢者幾人餘兒豈不堪立耶於是遣東宮官屬錄

帝言語動作每月奏聞帝懼威嚴矯情脩飾以是惡不
外聞嗣位之初方逞其欲大行在殯曾無戚容即逼亂
先帝宮人

興亡論曰帝朋淫於家乃至長樂亦有醜聲

纔踰年便恣聲樂采擇天下子女以充後宮好自矜夸
飾非拒諫禪位後彌復驕奢耽酗後宮或旬日不出公
卿近臣請事皆付闕官奏之所居宮殿帷帳昏飾以金
玉珠寶光華炫耀極麗窮奢及營洛陽宮雖未成畢其

規模壯麗踰漢魏遠矣唯自尊崇無所顧憚國典朝儀率情改變後宮位號莫能詳錄每對臣下稱天不稱朕以五色土塗所御天德殿各隨方色又於後宮與皇后等列坐用宗廟禮器罇彝珪瓚之屬以次食焉又令羣臣朝天臺者致齋三日清身一日車旗章服倍於前王之數既自比上帝不欲令人同己常自帶綬及冠通天冠加金附蟬顧見侍臣武弁上有金蟬及王公有綬者並令去之

興亡論曰帝少在儲宮頗覽經籍臨朝對衆亦有精神但稟性猜狂特好詭異

又不聽人有高大之稱諸姓高者改為姜九族稱高祖者為長祖曾為次長祖官稱名位凡謂上及大者改為長有天者亦改之又令天下車皆渾成為輪禁天下婦人皆不得施粉黛唯宮人得乘有輜車加粉黛西陽公溫乃杞公亮子帝之從祖兄也其妻尉遲氏有色因入朝帝飲以酒通淫之亮聞之懼謀反纔誅溫即追尉遲

氏入宮初為妃尋立為皇后每左右侍臣論議唯欲興造革易未嘗言及政事遊戲無恒出入不節羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好令京城少年為婦人服飾入殿歌舞與後宮觀之以為喜樂擯斥舊臣多所猜怨又吝於財略無賜與恐羣臣規諫不得行已志常遣左右密伺察之動止所為莫不抄錄小有乖違輒加其罪

興亡論曰帝屏棄羣臣內外門閤皆別令宦者守視
出入去來皆錄其數殿省以目相視

自公卿以下皆被楚撻其間誅戮黜免者不可勝言每
捶人皆以百二十為度名曰天杖後又加至二百四十
宮人內職亦如之后妃嬪御雖被寵嬖亦多杖背

興亡論曰後廷嬪妾房有數人自旦至夕每令危坐
相對有不如法便即捶楚隋書刑法志曰嘗作霹
靂車以威婦人又曰帝酣飲過度嘗中飲有下士楊

汝祐歌曰朝亦醉暮亦醉日日恒常醉政事日無次
鄭譯奏之命杖二百四十死後更使中士皇甫猛歌
猛歌又諷諫譯復奏之賜猛杖一百二十

於是內外恐懼人不自安皆求苟免莫有固志重足累
息以逮於終

靜皇帝諱衍後改名闡宣帝長子母朱皇后建德二年
六月生於東宮大象元年正月癸卯封魯王戊午立為
皇太子二月辛巳宣帝居鄴宮傳位於帝居正陽宮

二年五月乙未宣帝寢疾詔帝入宿路門學己酉宣帝
崩帝入居天臺廢正陽宮大赦停洛陽宮作庚戌尊天
元上皇太后為太皇太后天元聖皇太后李氏為大帝
太后天元太皇后為皇太后天太皇后朱氏為帝太后
其天中太皇后陳氏天右大皇后元氏天左大皇后尉
遲氏並出俗為尼以柱國漢王贊為上柱國揚州總管
隋公楊堅為假黃鉞左大丞相柱國秦王贊為上柱國
帝居諒闇百官總已聽於左大丞相壬子以上柱國鄖

公韋孝寬為相州總管罷入市稅錢六月戊午以柱國
許公宇文善神武公竇毅修武公侯莫陳瓊大安公閻
慶並為上柱國趙王招陳王純越王盛代王達滕王道
來朝庚申復佛道二教辛酉以柱國杞公贊燕公于竇
部公賀拔伏恩並為上柱國甲子相州總管尉遲迴舉
兵討丞相堅不受代詔發關中兵以韋孝寬為行軍元
帥攻之柱國畢王賢謀討丞相堅事泄遇害以上柱國
秦王贄為大冢宰杞公椿為大司徒己巳詔南定北光

衡巴四州人為宇文亮抑為奴婢者並免之甲戌有赤
氣起西方漸東行徧天庚辰罷諸魚池及山澤公禁者
與百姓共之以柱國蔣公梁睿為益州總管秋七月甲
申突厥送齊范陽王高紹義庚寅申州刺史李惠起兵
討丞相堅庚子詔陳趙越代滕五王入朝不趨劔履上
殿榮州刺史邵公宇文胃舉兵討丞相堅堅遣大將軍
楊素攻之青州總管尉遲勤舉兵討丞相堅丁未隋公
楊堅為都督內外諸軍事己酉鄆州總管司馬消難舉

兵討丞相堅以柱國楊公王誼為行軍元帥攻之壬子
趙王招越王盛謀討丞相堅遇害癸丑封皇弟行為萊
王術為郢王是月豫州襄州總管諸蠻各率種落起兵
八月庚申益州總管王謙舉兵討丞相堅不受代以梁
睿為行軍元帥攻之庚午韋孝寬破尉遲迴於鄴迴自
殺相州平移相州於安陽其鄴城及邑毀廢之丙子以
漢王贊為太師以上柱國并州總管申公李穆為太傅
以宋王實為大前疑以秦王贄為大右弼以燕公子實

為大左輔已卯以尉遲迴平大赦

李德林集載詔曰逆賊尉遲迴志懷奸慝因緣戚屬
位冠朝倫屬先皇晏駕獨欣天災稱兵擁衆便懷問
鼎乃詔太師肅茲九伐而凶徒孔熾充原蔽野諸將
肆雷霆之威壯士縱貔貅之氣直指漳濱擒斬元惡
羣醜喪魄咸集鼓下順高秋之氣就上天之誅兩河
妖孽一朝掃蕩自朝及野喜怵相趨思弘寬簡之政
用副億兆之心可大赦天下

愚按此楊堅所假也指忠為逆特錄之以著其惡

庚辰司馬消難擁衆以魯山甌山二鎮奔陳遣大將軍
元景山追擊之鄖州平沙州氏帥開府楊永安起兵應
王謙遣大將軍達奚儒攻之楊素破宇文胄於滎陽害
之以上柱國神武公竇毅為大司馬以齊公于智為大
司空廢相青荆金晉梁州六總管九月丙戌廢河陽總
管為鎮隸洛州以小宗伯竟陵公楊慧為大宗伯壬辰
廢皇后司馬氏為庶人戊戌以柱國楊公王誼為上柱

國庾戌以柱國常山公于翼化政公宇文忻並為上柱
國進封翼為保國公忻為英國公壬子丞相去左右號
隋公楊堅為大丞相冬十月甲寅日有蝕之壬戌丞相
堅矯詔殺陳王純加堅大冢宰五府總於天官戊寅梁
睿破王譙害之傳首京師益州平十一月甲辰達奚儒
破楊永安沙州平丁未上柱國鄖公韋孝寬卒十二月
壬子以柱國蔣公梁睿為上柱國丁巳以柱國邠公楊
雄普安公賀蘭暮郎公梁士彥上大將軍新寧公叱列

長文武鄉公崔弘度大將軍中山公宇文恩濮陽公宇文述渭原公和干子任城公王景漁陽公楊銳上開府廣宗公李崇隴西公李詢並為上柱國庚申以柱國楚公豆盧勣為上柱國癸亥詔曰太祖受命龍德猶潛三分天下志扶魏室多所改作冀允上立文武羣官賜姓者衆本殊國邑實乖胙土不歆非類異骨肉而共蒸嘗不愛其親嗟行路而叙昭穆朕君臨區宇累世於茲可仍遵謙杞之旨久行權宜之制諸改姓者悉宜復舊甲

子大丞相隋公楊堅進爵為王以郡為隋國已巳以柱
國沛公鄭譯為上柱國辛未隋王堅矯詔殺代王達滕
王道士申以大將軍長寧公楊勇為上柱國大司馬以
小冢宰始平公元孝矩為大司寇

大定元年春正月壬午改元

冊府元龜載詔曰朕以不天夙遭殛罰光陰遄遽
及此辰踰祀革號憲章前典可改大定元年

丙戌詔戎秩上開府以上職事下大夫以上外官刺史

以上各舉賢才二月庚午大丞相隋王楊堅為相國總
百揆加九錫甲子帝遜位於隋居別宮隋氏封帝為介
國公邑萬戶車服禮樂一如周制上書不稱表答表不
稱詔有其文事竟不行

隋書五行志曰周初有童謠云白楊樹頭金雞鳴祇
有阿舅無外甥帝嫡母楊后也為隋氏甥

隋開皇元年五月壬申隋主楊堅弒帝崩時年九歲謚
曰靜皇帝葬恭陵

隋書本紀曰以其族人洛嗣 愚按宇文氏保全元
族自羅赤族詎曰天道然考介公一爵厯隋唐梁後
唐晉五朝或備二王後或備三恪見五代史冊府元
龜不絕其血食亦云長矣猶是保全元族之餘波也
論曰自東西否隔二國爭強戎馬生郊干戈日用兵連
禍結力敵勢均疆場之事一彼一此武皇繼業未親萬
機慮遠謀深以蒙養正及英威電發朝政惟新內難既
除外畧方始苦心焦思克已勵精勞役為士卒之先居

處同匹夫之儉脩富國之政務強兵之術乘讐人之有
釁順天道而推亡數年之間大勲斯集攄祖宗宿憤拯
東夏阡危盛矣哉有成功者也若使翌日之瘳無爽經
營之志獲申黷武窮兵雖見譏於良史雄圖遠畧足方
駕於前王而識嗣子非才顧宗祐至重滯愛同於晉武
則哲異於宋宣但欲威之覆楚期於懲萌義方之教豈
若是乎卒使昏虐君臨奸回肆毒宣后之行事身沒已
幸矣靜帝越自幼冲紹茲衰統內外挾孫劉之詐戚藩

無齊代之強隋氏因之遂遷龜鼎雖復岷峨投袂翻成
凌奪之威漳滏勤王無救宗周之隕嗚呼以文皇經啟
鴻基武皇克隆景業未踰二紀不祀忽諸斯蓋宣帝餘
殃非孺子罪戾也

南北史合注卷九十六